

四庫全書

集部

欽定四庫全書

東坡全集卷二

宋 蘇軾 撰

詩八十三首

和子由記園中草木十一首

煌煌帝王都赫赫走羣彥嗟汝獨何為閉門觀物變微  
物豈足觀汝獨觀不倦牽牛與葵蓼採摘入詩卷吾聞  
東山傳置酒攜嫵婉富貴未能忘聲色聊自遣汝今又  
不然時節看瓜蔓懷寶自足珍藝蘭那計晚吾歸於汝

處慎勿嗟歲晚

荒園無數畝草木動成林春陽一已敷妍醜各自矜蒲  
萄雖滿架困倒不能任可憐病石榴花如破紅襟葵花  
雖粲粲蒂淺不勝簪叢蓼晚可喜輕紅隨秋深物生感時  
節此理等廢興飄零不自由盛亦非汝能

種栢待其成栢成人亦老不如種叢篁春種秋可倒陰  
陽不擇物美惡隨意造栢生何苦艱似亦費天巧天工  
巧有幾肯盡為汝耗君看藜與藿生意常草草

萱草雖微花孤秀自能拔亭亭亂葉中一一芳心插牽  
牛獨何畏詰曲自牙蘂走尋荆與榛如有宿昔約南齋  
讀書處亂翠曉如淚偏工貯秋雨歲歲壞離落

蘆筍初似竹稍開葉如蒲方春節抱甲漸老根生鬚不  
愛當夏綠愛此及秋枯黃葉倒風雨白花搖江湖江湖  
不可到移植苦勤劬安得雙野鴨飛來成畫圖

行樂惜芳晨秋風常苦早誰知念離別喜見秋瓜老秋  
瓜感霜霰莖葉颯已槁宦遊歸無時身若馬繫阜悲

鳴念千里耿耿志空抱多憂竟何為使汝玄髮縞

官舍有叢竹結根問囚廳下為人所徑上密不容釘慙  
戒吏卒插棘護中庭遶砌忽墳裂走鞭瘦鈴鐸我常攜  
枕簟來此陰寒青日暮不能去卧聽牕風冷

芎藭生蜀道白芷來江南漂流到關輔猶不失芳甘濯  
濯翠莖滿惜惜清露涵及其未花實可以資筐籃秋節  
忽已老苦寒非所堪斲根取其實對此微物慙

自我來關輔南山得再遊山中亦何有草木媚深幽芎

蒲人不識生此亂石溝山高霜雪苦苗葉不得抽下有  
千歲根蹙縮如蟠虬長為鬼神守德薄安敢偷

我歸自南山山翠猶在目心隨白雲去夢繞山之麓汝  
從何方來笑齒粲如玉探懷出新詩秀語奪山綠覺來  
已茫昧但記說秋菊有如採樵子入洞聽琴筑歸來寫  
遺聲猶勝人間曲

八月十一日夜宿府學方和此詩夢  
與弟遊南山出詩數十篇夢中甚愛

之及覺唯記一句

云蟋蟀悲秋菊

野菊生秋澗芳心空自知無人驚歲晚唯有暗蛩悲花

開澗水上花落澗水湄菊衰蛩亦蟄與汝歲相期楚客  
方多感秋風詠江籬落英不滿菊何以慰朝饑

周公廟廟在岐山西北七八里廟後百許步有  
泉依山湧冽異常國史所謂潤德泉世亂則  
竭者也

吾今那復夢周公尚喜秋來過故宮翠鳳舊依山碑兀  
清泉長與世窮通至今遊客傷離黍故國諸生詠雨濛  
牛酒不來烏鳥散白楊無數暮號風

南溪之南竹林中新構一茆堂予以其所處最  
為深邃故名之避世堂

猶恨溪堂淺更穿修竹林高人不畏虎避世已無心  
隱几顏如病忘言兀以瘠茆茨追上古冠蓋謝當今曉夢  
援呼覺秋懷鳥伴吟暫來聊解帶屢去欲攜衾湖上行  
人絕堦前暮雪深應逢綠毛叟叩戶夜抽簪

自清平鎮遊樓觀五郡大秦延生仙遊徃反四

日得十一詩寄舍弟子由同作



樓觀

鳥噪援呼晝閉門寂寥誰識古皇尊青牛久已辭轅軛  
白鶴時來訪子孫山近朔風吹積雪天寒落日淡孤村  
道人應怪遊人衆汲盡堦前井水渾

五郡

古觀正依林麓斷居民來說水泉甘亂谿赴渭爭趨北  
飛鳥迎山不復南羽客衣冠朝上象野人香火祝春蠶  
汝師豈解言符命山鬼何知託老聃

觀有明皇碑言夢老子告以享國長

久之  
意

授經臺

乃南山一峯耳  
非復有築處

劍舞有神通  
草聖海山無  
事化琴工  
此臺一覽秦  
川小  
不待傳經意  
已空

大秦寺

晃蕩平川盡  
坡陀翠麓橫  
忽逢孤塔迥  
獨向亂山明  
信足幽尋遠  
臨風却立驚  
原田浩如海  
袞袞盡東傾

仙遊潭

五首潭上有寺三二在潭北循黑水  
而上為東路至南寺渡黑水西里餘

從馬北上為西路至北寺東路險不可騎馬  
而西路隔潭潭水深不可測上以一木為橋  
不敢過故南寺有塔望  
之可愛而終不能到

翠壁下無路何年雷雨穿光搖巖上寺深到影中天我

欲然犀看龍應抱寶眠誰能孤石上危坐試僧禪

潭

東去愁攀石西來怯渡橋碧潭如見試白塔苦相招野

魄慙微薄村沽慰寂寥路窮斤斧絕松桂得干霄

南寺

唐初傳有此亂後不留碑畏虎關門早無村得米遲山

泉自入甕野桂不勝炊信美那能久應先學忍饑

北寺

未應將軍聘初從季直遊絳紗生不識蒼石尚能留豈

害依梁冀何須困李侯吾詩慎勿刻猿鶴為君羞

馬融石室

洞裏吹簫子終年守獨幽石泉為曉鏡山月當簾鉤歲

晚杉楓盡人歸霧雨愁送迎應鄙陋誰繼楚臣謳

玉女洞

愛玉女洞中水既致兩瓶恐後復取而為使  
者見紹因破竹為契使寺僧藏其一以為往  
來之信戲謂之調水符

欺謾久成俗關市有契繻誰知南山下取水亦置符古

人辨淄澠皎若鶴與鳬吾今既謝此但視符有無常恐  
汲水人智出符之餘多防竟無及棄置為長吁

自仙遊回至黑水見居民姚氏山亭高絕可  
愛復憩其上

山鵝曉辭谷似報遊人起出門猶屢顧慘若去吾里道  
途險且迂繼此復能幾溪邊有危構歸駕聊復杙愛此  
山中人縹緲如仙子平生慕獨往官爵同一屣胡為此  
谿邊眷眷若有竢國恩久未報念此慙且泚臨風浩悲

咤萬世同一軌何年謝簪紱丹砂留迅晷

南谿有會景亭處衆亭之間無所見甚不稱其  
名余欲遷之少西臨斷岸西嚮可以遠望而  
力未暇特為製名曰招隱仍為詩以告來者  
庶幾遷之

飛簷臨古道高榜勸遊人未即令公隱聊須濯路塵  
茆茨分聚落烟火傍城闌林缺湖光漏牕明野意新  
居民惟白帽過客謾朱輪山好留歸屐風迴落醉巾  
他年誰

卷二  
改築舊製不須因再到吾雖老猶堪作坐賓

凌虛臺

才高多感激道直無往還不如臺上舉酒邀青山  
青山雖云遠似亦識公顏崩騰赴幽賞披豁露天慳  
落日銜翠壁暮雲點烟鬟浩歌清興發放意未禮刪  
是時歲云暮微雪灑袍斑吏退迹如掃賓來勇躋攀  
臺前飛鴈過臺上彫弓彎聯翩向空墜一笑驚塵寰

竹颿

野人獻竹飀腰腹大如盎自言道旁得採不費置罔鷓夷  
讓圓滑混沌慙瘦與兩牙雖有餘四足僅能髣逢人自  
驚蹶悶若兒脫襁念茲微陋簣刀几安足枉就禽太倉  
卒羞愧不能饗南山有孤熊擇獸行舐掌

漢陂魚

陂在  
鄆縣

霜筠細破為雙掩中有長魚如卧劍紫荇穿顚氣慘悽  
紅鱗照坐光磨閃攜來雖遠鬣尚動烹不待熟指先染  
坐客相看為解顏香粳飽送如填塹早歲嘗為荆渚客



金匱要略卷之二  
黃魚屢食沙頭店濱江易採不復珍盈尺輒棄無乃僭  
自從西征復何有欲致南烹嗟久欠游修瑣細空自腥  
亂骨縱橫動遭砭故人遠餽何以報客俎久空驚忽膳  
東道無辭信使頻西隣幸有庖鑿醢

讀道藏

嗟子亦何幸偶此琳宮居宮中復何有戢戢千函書盛  
以丹錦囊冒以青霞裾王喬掌關籥蚩尤守其廬乘閒  
竊掀攪涉獵豈暇徐至人悟一言道集由中虛心閑反

自照皎皎如芙蓉千載厭世去此言乃遽蔭人皆忽其身治之用土苴何暇及天下幽憂吾未除

十二月十四日夜微雪明日早往南谿小酌至

晚

南谿得雪真無價走馬來看及未消獨自披榛尋履迹最先犯曉過朱橋誰憐破屋眠無處坐覺村飢語不罵惟有暮鷗知客意驚飛千片落寒條

九月中曾題二小詩於南溪竹上既而忘之昨

日再遊見而錄之

湖上蕭蕭疎雨過山頭靄靄暮雲橫陂塘水落荷將盡  
城市人歸虎欲行

誰謂江湖居而為虎豹宅焚山豈不能愛此千竿碧

司竹監燒葦園因召都巡檢柴貽勗左藏以其  
徒會獵園下

官園刈葦歲留槎深冬放火如紅霞枯槎燒盡有根在  
春雨一洗皆萌芽黃狐老兔最狡捷賣侮百獸常矜誇

年年此厄竟不悟但愛蒙密爭來家風迴焰卷毛尾熱  
欲出已被蒼鷹遮野人來言此最樂徒手腕出歸滿車  
巡邊將軍在近邑呼來颯颯從矛叉戍兵久閒可小試  
戰鼓雖凍猶堪搗雄心欲搏南澗虎陣勢頗學常山蛇  
霜乾火烈聲爆野飛走無路號且呀迎人截來砮逢箭  
避犬逸去窮投置擊鮮走馬殊未厭但恐落日催棲鷗  
弊旗仆鼓坐數獲鞍挂雉兔肩分霞主人置酒聚狂客  
紛紛醉語晚更譁燎毛燔肉不暇割飲啗直欲追羲媧

青丘雲夢古所咤與此何啻百倍加苦遭諫疏說夷羿  
又被賦客嘲淫奢豈如閒官走山邑放曠不與趨朝衙  
農工已畢歲云暮車騎雖少賓殊佳酒酣上馬去不告  
獵獵霜風吹帽斜

和子由木山引水二首

蜀江久不見滄浪江上枯槎遠可將去國尚能三犢載  
汲泉何愛一夫忙崎嶇好事人應笑冷淡為歡意自長  
遙想納涼清夜永牕前微月照汪汪

千年古木卧無梢浪卷沙翻去似瓢幾度過秋生蘚暈  
至今流潤應江潮泫然疑有蛟龍吐斷處人言霹靂焦  
材大古來無適用不須鬱鬱慕山苗

寄題興州晁太守新開古東池

百畝新池傍郭斜居人行樂路人誇自言官長如靈運  
能使江山似永嘉縱飲坐中遺白恰幽尋盡處見桃花  
不堪山鳥號歸去長遣王孫苦憶家

華陰寄子由

三年無日不思歸夢裏還家旋覺非  
臘酒送寒催去國東風吹雪滿征衣  
三峰已過天浮翠四扇行看日照扉  
里埃消磨不禁盡速攜家餉勞驂駢

和董傳留別

麕緇大布裹生涯腹有詩書氣自華  
厭伴老儒烹瓠葉強隨舉子踏槐花  
囊空不辦尋春馬眼亂行看擇壻車  
得意猶堪誇世俗詔黃新濕字如鴉

次韻柳子玉見寄

薄雷輕雨曉晴初陌上春泥未濺裾行樂及時雖有酒  
出門無侶漫看書遙知寒食催歸騎定把鴟夷載後車  
他日見邀須強起不應辭病似相如

送曾子固倅越得燕字

醉翁門下士雜遝難為賢曾子獨超軼孤芳陋羣妍昔  
從南方來與翁兩聯翩翁今自憔悴子去亦宜然賈誼  
窮適楚樂生老思燕那因江鱸美遽厭天庖糲但苦世  
論隘聒耳如蜩蟬安得萬頃池養此橫海鱣



王願赴建州錢監求詩及草書

我昔識子自武功寒廳夜語樽酒同酒闌燭盡語不盡  
倦僕立寐僵屏風丁寧勸學不死訣自言親受方瞳翁  
嗟余聞道不早悟醉夢顛倒隨盲聾爾來憂患苦摧剥  
意思蕭索如霜蓬羨君顏色愈少壯外慕漸少由中充  
河車挽水灌腦黑丹砂伏火入頰紅大梁相逢又東去  
但道何日辭樊籠未能便乞勾漏令官曹似是錫與銅  
留詩河上慰離別草書未暇緣怱怱

秀州僧本瑩靜照堂

鳥囚不忘飛馬繫常念馳靜中不自勝不若聽所之君  
看厭事人無事乃更悲貧賤苦形勞富貴嗟神疲作堂  
名靜照此語子謂誰江湖隱淪士豈無適時資老死不自  
惜扁舟自娛嬉從之恐莫見况肯從我為

石蒼舒醉墨堂

人生識字憂患始姓名粗記可以休何用草書誇神速  
開卷懽悅令人愁我嘗好之每自笑君有此病何年瘳

自言其中有至樂適意無異逍遙遊近者作堂名醉墨  
如飲美酒銷百憂乃知柳子語不妄病嗜土炭如珍羞  
君於此藝亦云至堆牆敗筆如山丘興來一揮百紙盡  
駿馬倏忽踏九州我書意造本無法點畫信手煩推求  
胡為議論獨見假隻字片紙皆藏收不減鍾張君自足  
下方羅趙我亦優不須臨池更苦學完取絹素充衾裯

送安惇秀才失解西歸

舊書不厭百回讀熟讀深思子自知他年名宦恐不免

今日栖遲那可追我昔家居斷還往著書不復窺園葵  
竭來東遊慕人爵棄去舊學從兒嬉狂謀謬算百不遂  
惟有霜鬢來如期故山松栢皆手種行且拱矣歸何時  
萬事早知皆有命十年浪走寧非癡與君未可較得失  
臨別惟有長嗟咨

送任伋通判黃州兼寄其兄孜

吾州之豪任公子少年盛壯日千里無媒自進誰識之  
有才不用今老矣別來十年學不厭讀破萬卷詩愈美

黃州小郡隔谿谷茆屋數家依竹葦知命無憂子何病  
見賢不薦誰當耻平泉老令更可悲六十青衫貧欲死  
桐鄉遺老至今泣潁川大姓誰能筭因君寄聲問消息  
莫對黃鸝矜爪觜

和子由初到陳州見寄二首次韻

道喪雖云久吾猶及老成如今各衰晚那更治刑名懶  
惰便攜散踈狂託聖明阿奴須碌碌門戶要全生

舊隱三年別杉松好在不吾今尚眷眷此意恐悠悠閑

戶時尋夢無人可說愁還來送別處雙淚寄南州

次韻子由綠筠堂

愛竹能延客求詩剩挂牆風梢千蠹亂月影萬夫長  
谷鳥驚碁響山蜂識酒香只應陶靖節會聽北牕涼

送劉攽倅海陵

君不見阮嗣宗臧否不挂口莫誇舌在牙齒牢是中惟  
可飲醇酒讀書不用多作詩不須工海邊無事日日醉  
夢魂不到蓬萊宮秋風昨夜入庭樹尊絲未老君先去

君先去幾時回劉郎應白髮桃花開不開

送錢藻出守婺州得英字

老手便劇郡高懷厭承明聊紆東陽綬一濯滄浪纓東  
陽佳山水未到意已清過家父老喜出郭壺漿迎子行  
得所願愴恨居者情吾君方急賢日旰坐邇英黃金招  
樂毅白璧賜虞卿子不少自貶陳義空崢嶸古稱為郡  
樂漸恐煩敲撈臨分敢不盡醉語醒還驚

送呂希道知和州

去年送君守解梁今年送君守歷陽年年送人作太守  
坐受塵土堆胸腸君家聯翩三將相富貴未已今方將  
鳳雛驥子生有種毛骨往往傳諸郎觀君崛鬱負奇表  
便合劍佩趨明光胡為小郡屢奔走征馬未解風帆張  
我生本自便江海恐耻未去猶徬徨無言贈君有長歎  
美哉河水空洋洋

次韻王誨夜坐

愛君東閣能延客顧我閒官不計員策杖頻過如未厭



卜居相近豈辭遷莫將詩句驚搖落漸喜樽罍省撲綠  
待約月明池上宿夜深同看水中天

送文與可出守陵州

壁上墨君不解語見之尚可消百憂而況我友似君者  
素節凜凜欺霜秋清詩健筆何足數逍遙齊物追莊周  
奪官遣去不自覺曉梳脫髮誰能收江邊亂山赤如赭  
陵陽正在千山頭君知遠別懷抱惡時遣墨君解我愁

送劉道原歸覲南康

晏嬰不滿六尺長高節萬仞陵首陽青衫白髮不自歎  
富貴在天那得忙十年閉戶樂幽獨百金購書收散亡  
竭來東觀弄丹墨聊借舊史誅姦強孔融不肯下曹操  
汲黯本自輕張湯雖無尺筭與寸刃口吻排擊含風霜  
自言靜中閱世俗有似不飲觀酒狂衣巾狼藉又屢舞  
旁人大笑供千場交朋翩翩去略盡惟我與子猶徬徨  
世人共棄君獨厚豈敢自愛恐子傷朝來告別驚何速  
歸意已逐征鴻翔匡廬先生古君子挂冠兩紀鬢未蒼

定將文度置膝上喜動隣里烹猪羊君歸為我道姓字  
幅巾他日容登堂

出都來陳所乘船上有題小詩八首不知何人  
作有感余心者聊為和之

蛙鳴青草泊蟬噪垂楊浦吾行亦偶然及此新過雨  
鳥樂忘罾魚樂忘鉤餌何必擇所安滔滔天下是  
烟火動村落晨光尚熹微田園處處好淵明胡不歸  
我行無疾徐輕楫信溶漾船留村市鬧聞發寒波漲

舟人苦炎熱宿此喬木灣清月未及上黑雲如頽山  
萬竅號地籟衝風散天池喧匝瞬息間還挂斗與箕  
潁水非漢水亦作蒲萄綠恨無襄陽兒令唱銅鞮曲  
我詩雖云拙心平聲韻和年來煩惱盡古井無由波

次韻張安道讀杜詩

大雅初微缺流風困暴豪張為詞客賦變作楚臣騷展  
轉更崩壞紛綸閱俊髦地偏蕃怪產源失亂狂濤粉黛  
迷真色魚鰕易黍牢誰知杜陵傑名與謫仙高掃地收

千軌爭標看兩艘詩人例窮苦天意遣奔逃塵聞人亡  
鹿溟翻帝斬鼉艱危思李牧述作謝王褒失意各千里  
哀鳴聞九臯騎鯨遁滄海捋虎得綈袍巨筆屠龍手微  
官似馬曹迂踈無事業醉飽死遊遨簡牘儀刑在兒童  
篆刻勞今誰主文字公合把旌旄開卷遙相憶知音兩  
不遭般斤思郢質鯢化陋條濠恨我無佳句時蒙致白  
醪慙慙理黃菊未遣沒蓬蒿

送張安道赴南都留臺

我公古仙伯超然美門姿偶懷濟物志遂為世所縻黃  
龍遊帝郊簫韶鳳來儀終然反溟極豈復安籠池出入  
四十年憂患未嘗辭一言有歸意闔府諫莫移吾君信  
英睿搜士及茆茨無人長者側何以安子思歸來掃一  
室虛白以自怡遊於物之初世俗安得知我亦世味薄  
因循鬢生絲出處良細事從公當有時

傳堯俞濟源草堂

微官共有田園興老罷方尋隱退廬栽種成陰十年事

金定四庫全書  
卷二  
倉黃求買萬金無先生卜築臨清濟喬木如今似畫圖  
鄰里亦知偏愛竹春來相與護龍雛

陸龍圖詵挽詞

挺然直節庇我岷謀道從來不計身屬續家無十金產  
過車巷哭六州民塵埃輦寺三年別樽俎岐陽一夢新  
他日思賢見遺像不論宿草更沾巾

成都思賢閣畫諸公像

胡完夫母周夫人挽詞

柏舟高節冠鄉隣絳帳清風聳搢紳豈似凡人但慈母

能令孝子作忠臣當年織屨隨方進晚節稱觴見伯仁  
回首悲涼便陳迹凱風吹盡棘成薪

和柳子玉過陳絕糧二首

風雨蕭蕭夜晦迷不須鳴叫強知時多才久被天公怪  
闕食惟應爨婦知杜叟挽衣那及脰顏翁食粥敢言炊  
詩人情味真嘗遍試問於君底事虧

如我自觀猶可厭非君誰復肯相尋圖書跌宕悲年老  
燈火青熒語夜深早歲便懷齊物意微官敢有濟時心



南行十里成何事一聽秋濤萬鼓音

潁州初別子由二首

征帆挂西風別淚滴清潁留連知無益惜此須臾景我  
生三度別此別尤酸冷念子似先君木訥剛且靜寡詞  
真吉人介石乃機警至今天下士去莫如子猛嗟我久  
病狂意行無坎井有如醉且墜幸未傷輒醒從今得閒  
暇默坐消日永作詩解子憂持用日三省

近別不改容遠別涕沾胸咫尺不相見實與千里同人

生無離別誰知恩愛重始我來宛丘牽衣舞兒童便知  
有此恨留我過秋風秋風亦已過別恨終無窮問我何  
年歸我言歲在東離合既循環憂喜迭相攻悟此長太  
息我生如飛蓬多憂髮早白不見六一翁

歐陽少師令賦所蓄石屏

何人遺公石屏風上有水墨希微蹤不畫長林與巨植  
獨畫我眉山西雪嶺上萬歲不長之孤松崖崩澗絕可  
望不可到孤烟落日相溟濛含風偃蹇得真態刻畫始

信天有工我恐畢宏韋偃死葬號山下骨可朽爛心難  
窮神機巧思無所發化為烟霏淪石中古來畫師非俗  
士摹寫物象略與詩人同願公作詩慰不遇無使二子  
含憤泣幽宮

陪歐陽公燕西湖

謂公方壯鬚似雪謂公已老光浮頰竭來湖上飲美酒  
醉後劇談猶激烈湖邊草木新着霜芙蓉晚菊爭煌煌  
插花起舞為公壽公言百歲如風狂赤松共遊也不惡

誰能忍飢啖仙藥已將天壽付天公彼徒辛苦吾差樂  
城上烏棲暮靄生銀缸畫燭照湖明不辭歌詩勸公飲  
坐無桓伊能撫箏

十月一日將至渦口五里所遇風留宿

長淮久無風故意弄清快今朝雪浪滿始覺平野隘兩  
山控吾前吞吐久不暇孤舟繫桑本終夜舞澎湃舟人  
更傳呼弱纜恃管蒯平生傲憂患久已恬百怪鬼神欺  
吾窮戲我聊一噫鉶中尚有酒信命誰能戒

出潁口初見淮山是日至壽州

我行日夜向江海楓葉蘆花秋興長  
平淮忽迷天遠近  
青山久與船低昂  
壽州已見白石塔  
短棹未轉黃茅岡  
波平風軟望不到  
故人久立烟蒼茫

壽州李定少卿出餞城東龍潭上

山鴉噪處古靈湫  
亂沫浮涎遶客舟  
未暇然犀照奇鬼  
欲將燒燕出潛蚪  
使君惜別催歌管  
村巷驚呼聚獍猴  
此地他年頌遺愛  
觀魚并記老莊周

濠州七絕

塗山

下有鯀廟山  
前有禹會村

川鎖支祁水尚渾  
地理汪罔骨應存  
樵蘇已入黃熊廟  
烏鵲猶朝禹會村

彭祖廟

有雲母山云彭  
祖所採服也

跨歷商周看盛衰  
欲將齒髮鬪蛇龜  
空餐雲母連山盡  
不見蟠桃著子時

逍遙臺

莊子祠堂在開  
元寺即墓為堂

金史四庫全書  
卷二  
常怪劉伶死便埋豈伊忘死未忘骸烏鳶奪得與螻蛄  
誰信先生無此懷

觀魚臺

欲將同異較錨銖肝膽猶能楚越如若信萬殊歸一理  
子今知我我知魚

虞姬墓

帳下佳人拭淚痕門前壯士氣如雲倉黃不負君王意  
只有虞姬與鄭君

四望亭

大和中刺史劉翊之立李紳以太子賓客分司東都過濠為作記今存而

亭廢者

數年矣

顏垣破礎沒柴荆故老猶言短李亭敢請使君重起廢  
落霞孤鶩換新銘

浮山洞

洞在淮上夏潦不能及而冬不加高故人疑其浮也

人言洞府是鼇宮升降隨波與海通共坐船中那得見  
乾坤浮水水浮空



東坡全集卷二

欽定四庫全書

東坡全集卷三

宋 蘇軾 撰

詩七十六首

泗州僧伽塔

我昔南行舟繫汴逆風三日沙吹面舟人共勸禱靈塔  
香火未收旗脚轉回頭頃刻失長橋却到龜山未朝飯  
至人無心何厚薄我自懷私欣所便耕田欲雨刈欲晴  
去得順風來者怨若使人人禱輒遂造物應須日千變

我今身世兩悠悠去無所逐來無戀得行固願留不惡  
每到有求神亦倦退之舊云三百尺澄觀所營今已換  
不嫌俗士汙丹梯一看雲山遠淮甸

龜山

我生飄蕩去何求再過龜山歲五周身行萬里半天下  
僧卧一庵初白頭地隔中原勞北望潮連滄海欲東遊  
元嘉舊事無人記故壘推頽今在不

宋文帝遣將拒魏  
太武築城北山

發洪澤中塗遇大風復還

風浪忽如此吾行欲安歸掛帆却西邁此計未為非洪  
澤三十里安流去如飛居民見我還勞問亦依依攜酒  
就船賣此意厚莫違醒來夜已半岸木聲向微明日淮  
陰市白魚能許肥我行無南北適意乃所祈何勞弄澎  
湃終夜搖牕扉妻孥莫憂色更有篋中衣

十月十六日記所見

風高月暗水雲黃淮陰夜發朝山陽山陽曉霧如細雨  
炯炯初日寒無光雲收霧卷已亭午有風北來寒欲僵

忽驚飛電穿戶牖迅駛不復容遮防市人顛沛百賈亂  
疾雷一聲如頽牆使君來呼晚置酒坐定已復日照廊  
恍疑所見皆夢寐百種變怪旋消亡共言蛟龍厭舊穴  
魚鼈隨徙空陂塘愚儒無知守章句論說黑白推何祥  
惟有主人言可用天寒欲雪飲此觴

廣陵會三同舍各以其字為韻仍邀同賦

劉貢父

去年送劉郎醉語已驚眾如今各漂泊筆硯誰能弄我

命不在天羿穀未必中作詩聊遣意老大慵譏諷夫子  
少年時雄辯輕子貢爾來再傷弓戢翼念前痛廣陵三  
日飲相對恍如夢况逢賢主人白酒潑春甕竹西已揮  
手灣口猶屢送羨子去安閒吾邦正喧闐

孫巨源

三年客京輦憔悴難具論揮汗紅塵中但隨馬蹄翻人  
情貴往返不報生禍根坐令平生友終歲不及門南來  
實清曠但恨無與言不謂廣陵城得逢劉與孫異趣不

兩立譬如王孫猿吾儕久相聚恐見疑排根我編類中  
散子通真巨源絕交固未敢且復東南奔

劉莘老

江陵昔相遇幕府稱上賓再見明光宮義冠挹搢紳如  
今三見子坎坷為逐臣朝遊雲霄間欲分丞相茵莫落  
江湖上遂與屈子隣了不見喜愠子豈真可人邂逅成  
一歡醉語出天真士方在田里自比渭與莘出試乃大  
謬芻狗難重陳歲晚多霜露歸耕當及辰

遊金山寺

我家江水初發源，宦遊直送江入海。  
聞道潮頭一丈高，天寒尚有沙痕在。  
中泠南畔石盤陀，古來出沒隨濤波。  
試登絕頂望鄉國，江南江北青山多。  
羈愁畏晚尋歸楫，山僧苦留看落日。  
微風萬頃斂文細，斷霞半空魚尾赤。  
是時江月初生魄，二更月落天深黑。  
江心似有炬火明，飛焰照山棲鳥驚。  
惘然歸卧心莫識，非鬼非人竟何物。  
江山如此不歸山，江神見怪驚我頑。  
我謝江神豈得已，



有田不歸如江水

是夜所見如此

自金山放船至焦山

金山樓觀何耽耽  
撞鐘擊鼓聞淮南  
焦山何有有修竹  
採薪汲水僧兩三  
雲霾浪打人迹絕  
時有沙戶祈春蠶  
我來金山更留宿  
而此不到心懷慙  
同遊盡返決獨往  
賦命窮薄輕江潭  
清晨無風浪自湧  
中流歌嘯倚半酣  
老僧下山驚客至  
迎笑喜作巴人談  
自言久客忘鄉井  
只有彌勒為同龕  
困眠得就紙帳暖  
飽食未厭山蔬甘

山林飢卧古亦有無田不退寧非貪展禽雖未三見黜  
叔夜自知七不堪行當投劾謝簪組為我佳處留茆庵  
吳人謂水中可田者為沙焦山長老中江人也

### 甘露寺

江山豈不好獨遊情易闌但有相攜人何必素所歡我  
欲訪甘露當途無閒官二子舊不識欣然肯聯鞍古郡  
山為城層梯轉朱欄樓臺斷崖上地窄天水寬一覽吞  
數州山長江漫漫却望大明寺惟見烟中竿很石卧庭

下穹隆如伏羶緬懷卧龍公挾策事瑯嶞一談收獬子  
再說走老瞞名高有餘想事往無留觀蕭翁古鐵鑊相  
對空團團坡陀受百斛積雨生微瀾泗水逸周鼎渭城  
辭漢盤山川失故態怪此能獨完僧繇六化人霓衣挂  
氷紉隱見十二疊觀者疑夸謾破板陸生畫青猊戲盤  
跚上有二天人揮手如翔鸞筆墨雖欲盡典刑垂不刊  
赫赫贊皇公英姿凜以寒古栢親手種挺然誰敢干枝  
撐雲峯裂根入石窟蟠薙草得斷碑斬崖出金棺瘞藏

豈不牢見伏理可歎四雄皆龍虎遺迹儼未刊方其盛  
壯時爭奪肯少安廢興屬造物遷逝誰控搏况彼妄庸  
子而欲事所難古今共一軌後世徒辛酸聊興廣武歎  
不待雍門彈

次韻子由柳湖感物

憶昔子美在東屯數間茆屋蒼山根嘲吟草木調蠻獠  
欲與猿鳥爭啾喧子今憔悴衆所棄驅馬獨出無往還  
惟有柳湖萬株柳清陰與子供朝昏胡為譏評不少借

生意凌挫難為繁柳雖無言不解愠世俗乍見應憮然  
嬌姿共愛春濯濯豈問空腹脩蛇蟠朝看濃翠傲炎赫  
夜愛踈影搖清圓風翻雪陣春絮亂蟲響啄木秋聲堅  
四時盛衰各有態搖落淒愴驚寒溫南山孤松積雪底  
抱凍不死誰復賢

送蔡冠卿知饒州

吾觀蔡子與人遊掀脰笑語無不可平時儻蕩不驚俗  
臨事迂闊乃過我橫前坑窅衆所畏布路金珠誰不裹

爾來變化驚何速昔號剛強今亦頗憐君獨守廷尉法  
晚歲却理鄱陽柁莫嗟天驥出羸牛欲試良玉須猛火  
世事徐觀真夢寐人生不信長轆轤知君決獄有陰功  
他日老人酬魏顆

次韻楊褒早春

窮巷淒涼苦未和君家庭院得春多不辭瘦馬騎衝雪  
來聽佳人唱踏莎破恨徑須煩麴蘖增年誰復怨羲娥  
良辰樂事古難並白髮青衫我亦歌細雨郊園聊種菜

金匱要略卷之三  
冷官門戶可張羅放朝三日君恩重睡美不知身在何  
初到杭州寄子由二絕

眼看時事力難勝貪戀君恩退未能遲鈍終須投劾去  
使君何日換顰丞

聖明寬大許全身衰病摧頽自畏人莫上岡頭苦相望  
吾方祭竈請比隣

次韻柳子玉二首

地爐

細聲蚯蚓發銀瓶擁褐橫眠天未明衰鬢鑷殘欹雪領  
壯心降盡倒風旌自稱丹竈鎔銖火倦聽山城長短更  
聞道牀頭惟竹几夫人應不解卿卿

俗謂竹几  
為竹夫人

紙帳

亂文龜殼細相連慣卧青綾恐未便潔似僧巾白氎布  
暖於蠻帳紫茸氈錦衾連卷持還客破屋那愁仰見天  
但恐嬌兒還惡睡夜深踏裂不成眠

臘日遊孤山訪惠勤惠思二僧



天欲雪雲滿湖樓臺明滅山有無水清石出魚可數林  
深無人鳥相呼臘日不歸對妻孥名尋道人實自娛道  
人之居在何許寶雲山前路盤紆孤山孤絕誰肯廬道  
人有道山不孤紙牕竹屋深自暖擁褐坐睡依團蒲天  
寒路遠愁僕夫整駕催歸及未晡出山迴望雲木合但  
見野鵲盤浮圖茲遊淡泊歡有餘到家恍如夢遽遽作  
詩火急追亡逋清景一失後難摹

李杞寺丞見和前篇復用元韻答之

獸在藪魚在湖一入池檻歸期無誤隨弓旌落塵土坐  
使鞭箠環呻呼追胥連保罪及孥

近屢獲鹽賊皆  
坐同保徙其家

百日

愁歎一日娛白雲舊有終老約朱綬豈合山人紆人生  
何者非遽廬故山鶴怨秋猿孤何時自駕鹿車去掃除  
白髮煩葛蒲麻鞋短後隨獵夫射弋狐兔共朝晡陶潛  
自作五柳傳潘閔畫入三峰圖吾年凜凜今幾餘知非  
不去慙衛遽歲荒無術歸亡逋鵠則易畫虎難摹

再和

東望海西望湖山平水遠細欲無野人踈狂逐魚釣刺  
史寬大容歌呼君恩飽煖及爾孥才者不閒拙者娛穿  
巖度嶺脚力健未厭山水相縈紆三百六十古精廬出  
遊無伴籃輿孤作詩雖未造藩閥破悶豈不賢撈蒲君  
才敏瞻兼百夫朝作千篇日未脯竭來湖上得佳句從  
此不看營丘圖知君篋櫝富有餘莫惜錦繡償管籥窮  
多鬪嶮誰先逋賭取名畫不用摹

遊靈隱寺得來詩復用前韻

君不見錢塘湖錢王壯觀今已無屋堆黃金斗量珠運  
盡不勞折簡呼四方宦遊散其孥宮闕留與閒人娛盛  
衰哀樂兩須臾何用多憂心鬱紆溪山處處皆可廬最  
愛靈隱飛來孤喬松百丈蒼髯鬚擾擾下笑柳與蒲高  
堂會食羅千夫撞鐘擊鼓喧朝晡凝香方丈眠氍毹絕  
勝絮被縫海圖清風時來驚睡餘遂超羲皇傲几蘧歸  
時棲鴉正畢逋孤烟落日不可摹

戲子由

宛丘先生長如丘宛丘學舍小如舟常時低頭誦經史  
忽然欠伸屋打頭斜風吹帷雨注面先生不愧旁人羞  
任從飽死笑方朔肯為雨立求秦優眼前勃磔何足道  
處置六鑿須天遊讀書萬卷不讀律致君堯舜知無術  
勸農冠蓋鬧如雲送老蠶鹽甘似蜜門前萬事不掛眼  
頭雖長低氣不屈餘杭別駕無功勞畫堂五丈容旂旄  
重樓跨空雨聲遠屋多人少風騷騷平生所慙今不耻  
坐對疲氓更鞭箠道逢楊虎呼與言心知其非口諾唯

居高忘下真何益，氣節消縮今無幾。  
文章小技安足程，先生別駕舊齊名。  
如今衰老俱無用，付與時人分重輕。  
越州張中舍壽樂堂

青山偃蹇如高人，常時不肯入官府。  
高人自與山有素，不待招邀滿庭戶。  
卧龍蟠屈半東州，萬室鱗鱗枕其股。  
背之不見與無同，狐裘反衣無乃魯。  
張君眼力覩天與，能遣荊棘化堂宇。  
持醵宴坐不出門，收攬奇秀得十五。  
才多事少厭閒寂，卧看雲烟變風雨。  
笋如玉筍筵如簪，

強飲且為山作主不憂兒輩知此樂但恐造物怪多取  
春濃睡足午牕明想見新茶如潑乳

姚屯田挽詩

京口年來耆舊衰高人淪喪路人悲空聞韋叟一經在  
不見恬侯萬石時貧病只知為善樂逍遙却恨棄官遲  
七年一別真如夢猶記蕭然瘦鶴姿

送岑著作

懶者常似靜靜豈懶者徒拙則近於直而直豈拙歟夫

子靜且直雍容時卷舒嗟我復何為相得歡有餘我本  
不違世而世與我殊拙於林間鳩懶於水底魚人皆笑  
其狂子獨憐其愚直者有時信靜者不終居而我懶拙  
病不受砭藥除臨行怪酒薄已與別淚俱後會豈無時  
遂恐出處踈惟應故山夢隨子到吾廬

吉祥寺賞牡丹

人老簪花不自羞花應羞上老人頭醉歸扶路人應笑  
十里珠簾半上鉤



吉祥寺僧求閣名

過眼榮枯電與風，久長那得似花紅。  
上人宴坐觀空閣，觀色觀空色即空。

和劉道原見寄

敢向清時怨不容，直嗟吾道與君東。  
坐談足使淮南懼，歸去方知冀北空。  
獨鶴不須驚夜旦，羣烏未可辨雌雄。  
廬山自古不到處，得與幽人子細窮。

和劉道原詠史

仲尼憂世接輿狂城穀雖殊竟兩亡吳客漫陳豪士賦  
桓侯初笑越人方名高不朽終安用日飲無何計亦良  
獨掩陳編弔興廢牕前山雨夜浪浪

和劉道原寄張師民

仁義大捷徑詩書一旅亭相夸綬若若猶誦麥青青腐  
鼠何勞嚇高鴻本自冥顛狂不用喚酒盡漸須醒

送張職方吉甫赴閩漕六和寺中作

羨君超然鸞鶴姿江湖欲下還飛去空使吳兒怨不留

青山漫漫七閩路門前江水去掀天寺後清池碧玉環  
君如大江日千里我如此水千山底

雨中遊天竺靈感觀音院

蠶欲老麥半黃前山後山雨浪浪農夫輟耒女廢筐白  
衣仙人在高堂

和蔡準郎中見邀遊西湖三首

夏潦漲湖深更幽西風落木芙蓉秋飛雪聞天雲拂地  
新蒲出水柳映洲湖上四時看不足惟有人生飄若浮

解頰一笑豈易得主人有酒君應留君不見錢塘遊宦  
客朝推囚暮決獄不因人喚何時休

城市不識江湖幽如與螭虺語春秋試令江湖處城市  
却似麋鹿遊汀洲高人無心無不可得坎且止乘流浮  
公卿故舊留不得遇所得意終年留君不見拋官彭澤  
令琴無絃巾有酒醉欲眠時遣客休

田間決水鳴幽幽插秧未遍麥已秋相攜燒筍苦竹寺  
却下踏藕荷花洲船頭斫鮮細縷縷船尾炊玉香浮浮

臨風飽食得甘寢肯使細故胸中留君不見壯士憔悴  
時飢謀食渴謀飲功名有時無罷休

和子由柳湖久涸忽有水開元寺山茶舊無花

今歲盛開二首

太昊祠東鐵墓西一罇曾與子同攜回瞻郡閣遙飛檻  
北望檣竿半隱堤飯豆羹藜思兩鵠飲河喫水賴長蜺  
如今勝事無人共花下壺盧鳥勸提

長明燈下石欄干長共杉松鬪歲寒葉厚有稜犀甲健

花深少態鶴頭丹久陪方丈曼陀雨羞對先生苜蓿盤  
雪裏盛開知有意明年開後更誰看

六月二十七日望湖樓醉書五首

黑雲翻墨未遮山白雨跳珠亂入船  
卷地風來忽吹散望湖樓下水如天

放生魚鼈逐人來無主荷花到處開  
水枕能令山俯仰風船解與月裴回

烏菱白芡不論錢亂繫青菰裹綠盤  
忽憶嘗新會靈觀

滯留江海得加餐

獻花游女木蘭橈  
細雨斜風濕翠翹  
無限芳洲生杜若  
吳兒不識楚詞招

未成小隱聊中隱  
可得長閒勝暫閒  
我本無家更安往  
故鄉無此好湖山

七月一日出城舟中苦熱

涼颼呼不來  
流汗方被體  
稀星乍明滅  
暗水光瀾瀾  
香風過蓮芡  
驚枕裂魴鯉  
欠伸宿酒餘  
起坐濯清泚  
火雲

勢方壯未受月露洗身微欲安適坐待東方啓

宿餘杭法喜寺寺後綠野亭望吳興諸山懷孫

莘老學士

徙倚秋原上淒涼晚照中水流天不盡人遠思何窮問

謀知秦過看山識禹功

餘杭始皇所舍舟也西北舟枕山堯時洪水繫舟山上

稻涼

初吠蛤柳老半書蟲荷背風翻白蓮腮雨退紅追遊慰

遲暮覓句效兒童北望苕溪轉遙憐震澤通烹魚得尺

素好在紫髯翁



宿臨安淨土寺

鷄鳴發餘杭到寺已亭午參禪固未暇飽食良先務平生睡不足急掃清風宇閉門羣動息香篆起烟縷覺來烹石泉紫筍發輕乳晚涼沐浴罷衰髮稀可數浩歌出門去暮色入村塢微月半隱山圓荷爭瀉露相攜石橋上夜與故人語明朝入山房石鏡炯當路昔照熊虎姿今為猿鳥顧廢興何足弔萬世一仰俯

自淨土步至功臣寺

落日岸葛巾晚風吹羽扇松間野步穩竹外飛橋轉神  
功鑿橫嶺巖石得巨片直度千人溝下有微流注岡巒  
蔚回合金碧爛明絢緬懷異姓王負擔此鄉縣長逢跨  
下辱屢乞桑間飯誰謂山石頑識此希世彥凜然英氣  
逼屹起猶聳戰他年萬騎歸父老恣歡宴錦繡被原野  
金珠散貧賤實融既入朝吳芮空記面榮華坐銷歇閱  
世如郵傳惟有長明燈依然照深殿

遊徑山

衆峰來自天目山勢若駿馬奔平川中塗勒破千里足  
金鞭玉轡相回旋人言山住水亦住下有萬古蛟龍淵  
道人天眼識王氣結茆宴坐荒山巔精誠貫山石為裂  
天女下試顏如蓮寒牕暖足來朴朔夜鉢呪水降蜿蜒  
雪眉老人朝扣門願為弟子長參禪爾來廢興三百載  
奔走吳會輸金錢飛樓湧殿壓山谷朝鐘暮鼓驚龍眠  
晴空偶見浮海蜃落日下數投村鷺有生共處覆載內  
擾擾膏火同烹煎近來愈覺世路隘每到寬處差安便

嗟余老矣百事廢却尋舊學心茫然問龍乞水歸洗眼

欲看細字銷殘年

龍井水洗  
病眼有效

自徑山回得呂察推詩用其韻招之宿湖上

多君貴公子愛山如愛色心隨葉舟去夢遶千山碧新  
詩到中路令我喜折屐古來軒冕徒操捨兩悲慄數朝  
辭簪笏兩脚得暫赤歸來不入府却走湖上宅寵辱吾  
久忘寧畏官長詰飄然便欲去誰在子思側君能從我  
遊出郭及未黑

宿望湖樓再和

新月如佳人出海初弄色娟娟到湖上  
潏潏搖空碧夜涼人未寢山靜聞響屐  
騷人故多感悲秋更慄慄君胡不相就  
朱墨紛黝赤我行得所嗜十日忘家宅  
但恨無友生詩病莫訶詰君來試吟咏  
定作鶴頭側改罷心愈疑滿紙蛟虵黑

夜泛西湖五絕

新月生魄迹未安纔破五六漸盤桓  
今夜吐艷如半璧

遊人得向三更看

三更向闌月漸垂欲落未落景特奇明朝人事誰料得  
看到蒼龍西沒時

蒼龍已沒牛斗橫東方芒角昇長庚漁人收筒及未曉

船過惟有菰蒲聲

湖上禁漁皆  
盜釣者也

菰蒲無邊水茫茫荷花夜開風露香漸見燈明出遠寺  
更待月黑看湖光

湖光非鬼亦非仙風恬浪靜光滿川須臾兩兩入寺去

金匱口唇合書  
就視不見空茫然

焦千之求惠山泉詩

茲山定空中乳水滿其腹遇隙則發見臭味實一族淺  
深各有值方圓隨所蓄或為雲洶涌或作綫斷續或鳴  
空洞中雜佩間琴筑或流蒼石縫宛轉龍鸞威鉗罌走  
四海真偽半相瀆貴人高宴罷醉眼亂紅綠赤泥開方  
印紫餅截圓玉傾甌共歎賞竊語笑僮僕豈如泉上僧  
盥灑自挹掬故人憐我病弱籠寄新馥欠伸北牕下晝

睡美方熟精品厭凡泉願子致一斛

答任師中次韻

來詩勸以  
詩酒自娛

閒裏有深趣常憂兒輩知已成歸蜀計誰惜買山貲世  
事久已謝故人猶見思平生不飲酒對子敢論詩

沈諫議召遊湖不赴明日得雙蓮於北山下作

一絕持獻沈既見和又別作一首因用其韻

湖上棠陰手自栽問公更得幾回來水仙亦恐公歸去  
故遣雙蓮一夜開



詔書行捧縷金牋樂府應歌相府蓮莫忘今年花發處  
西湖西畔北山前

和歐陽少師會老堂次韻

一時冠蓋盡嚴終舊德年來豈易逢聞道堂中延蓋叟  
定應牀下拜梁松蠹魚自晒閒箱篋科斗長收古鼎鐘  
我欲棄官重問道寸筵何以得春容

和歐陽少師寄趙少師次韻

朱門有遺啄千里來燕雀公家冷如水百呼無一諾平

生親友半遷逝公雖不怪旁人愕世事如今臘酒濃交  
情自古春雲薄二公凜凜和非同疇昔心親豈貌從白  
頭相映松間鶴清句更酬雪裏鴻何日揚雄一廛足却  
追范蠡五湖中

監試呈諸試官

我本山中人寒苦盜寸廩文詞雖少作勉強非天稟既  
得旋廢忘懶惰今十稔麻衣如再著墨水真可飲每聞  
科詔下白汗如流瀋此邦東南會多士敢題品芻蕘盡

蘭蓀香不數葵荏貧家見珠貝眩晃自難審緬懷嘉祐  
初文格變已甚千金碎全璧百衲收寸錦調和椒桂醲  
咀嚼沙礫礮廣眉成半額學步歸蹕蹉維時老宗伯氣  
壓羣兒凜蛟龍不世出魚鮪初驚滄至音久乃信知味  
猶食堪至今天下士微管幾左社謂當千載後石室祠  
高朕爾來又一變此學初誰論權衡破舊法芻豢笑凡  
飪高言追衛樂篆刻鄙曹沈先生周孔出弟子淵騫寢  
却顧老鈍軀頑樸謝錡鋟諸君沉才傑容我懶且噤聊

欲廢書眠秋濤諠午枕

望海樓晚景五絕

海上濤頭一線來  
樓前相顧雪成堆  
從今潮上君須上  
更看銀山二十回

橫風吹雨入樓斜  
壯觀應須好句誇  
雨過潮平江海碧  
電光時掣紫金蛇

青山斷處塔層層  
隔岸人家喚欲應  
江上秋風晚來急  
為傳鐘鼓到西興

樓下誰家燒夜香  
玉笙哀怨弄初涼  
臨風有客吟秋扇  
拜月無人見晚粧

沙河燈火照山紅  
歌鼓喧喧語笑中  
為問少年心在否  
角巾欹倒鬢如蓬

試院煎茶

蟹眼已過魚眼生  
飈飈欲作松風鳴  
蒙茸出磨細珠落  
眩轉遶甌飛雪輕  
銀瓶瀉湯誇第二  
未識古人煎水意

古語云煎水不煎茶

君不見昔時李生好客手自煎  
貴從活火發

新泉又不見今時潞公煎茶學西蜀定州花瓷琢紅玉  
我今貧病長苦飢分無玉盃捧蛾眉且學公家作茗飲  
博爐石鉋行相隨不用撐腸拄腹文字五千卷但願一  
甌常及睡足日高時

孫莘老求墨妙亭詩

蘭亭蠶紙入昭陵世間遺迹猶龍騰顏公變法出新意  
細筋入骨如秋鷹徐家父子亦秀絕字外出力中藏稜  
嶧山傳刻典刑在千載筆法留陽冰杜陵評書貴瘦硬

此論未公吾不憑短長肥瘠各有態玉環飛燕誰敢憎  
吳興太守真好古購買斷缺揮縑繒龜跌入坐螭隱壁  
空齋晝靜聞登登竒蹤散出走吳越勝事傳說誇友朋  
書來乞詩要自寫為把栗尾書谿藤後來視今猶視昔  
過眼百世如風燈他年劉郎憶賀監還道同時須服膺

李公擇求黃鶴樓詩因記舊所聞於馮當世者  
黃鶴樓前月滿川抱關老卒飢不眠夜聞三人笑語言  
羽衣着屐響空山非鬼非人意其仙石扉三叩聲清圓

洞中鏗鉉落門闕縹緲入石如飛烟雞鳴月落風馭還  
迎拜稽首願執鞭汝非其人骨腥羶黃金乞得重莫肩  
持歸包裹弊席羶夜穿茅屋光射天里閭來觀已變遷  
似石非石鉛非鉛或取而有衆忿喧訟歸有司今幾年  
無功暴得喜欲顛神人戲汝真可憐願君為考然不然  
此語可信馮公傳

八月十日夜看月有懷子由并崔度賢良

宛丘先生自不飽更笑老崔窮百巧一更相過三更歸



古柏陰中看參昴去年舉君首荷盤夜傾閩酒赤如丹  
今年還看去年月露冷遙知范叔寒典衣自種一頃豆  
那知積雨生科斗歸來四壁草蟲鳴不如王江長飲酒

王江陳

州道人

催試官考較戲作

八月十五夜月色隨處好不擇茆簷與市樓况我官居  
似蓬島鳳唼堂前野橘香劔潭橋畔秋荷老八月十八  
潮壯觀天下無鯢鵬水擊三千里組練長驅十萬夫紅

旗青蓋互明滅黑沙白浪相吞屠人生會合古難必此  
景此行那兩得願君聞此添蠟燭門外白袍如立鵠

八月十七復登望海樓自和前篇是日勝出余

與試官兩人復留五首

樓上烟雲怪不來樓前飛紙落成堆非關文字須重看  
却被江山未放回

眼昏燭暗細行斜考閱精強外已誇明日失杯君莫怪  
早知安足不成虵

亂山遮曉擁千層  
眇美初涼撼不應  
昨夜酒行君屢歎  
定知歸夢到吳興

天台桂子為誰香  
倦聽空階夜點涼  
賴有明朝看潮在  
萬人空巷鬪新粧

秋花不見眼  
花紅身在孤舟兀兀中  
細雨作寒知有意  
未教金菊出蒿蓬

東坡全集卷三

欽定四庫全書

東坡全集卷四

宋 蘇軾 撰

詩八十八首

秋懷二首

苦熱念西風常恐來無時及茲遂凄凜又作徂年悲蟋蟀鳴我牀黃葉投我幃牕前有棲鵬夜嘯如狐狸露冷梧葉脫孤眠無安枝熠燿亦求偶高屋飛相追定知無幾見迫此清霜期物化逝不留我興為嗟咨便當勤秉

燭為樂戒暮遲

海風東南來吹盡三日雨空階有餘滴似與幽人語念  
我平生歡寂寞守環堵壺漿慰作勞裹飯救寒苦今年  
秋應熟過從飽雞黍嗟我獨何求萬里涉江浦居貧豈  
無食自不安畎畝念此坐達晨殘燈翳復吐

哭歐公孤山僧惠思示小詩次韻

故人已為土衰鬢亦驚秋猶喜孤山下相逢說舊遊

梵天寺見僧守詮小詩清婉可愛次韻

但聞烟外鐘不見烟中寺幽人行未已草露濕芒屨惟  
應山頭月夜夜照來去

和陳述古拒霜花

千林掃作一番黃只有芙蓉獨自芳喚作拒霜知未稱  
細思却是最宜霜

和沈立之留別二首

而今父老千行淚一似當時初去時不用鐫碑頌遺愛  
丈人清德畏人知

卧聞鐃鼓送歸艎夢裏忽忽共一觴試問別來愁幾許  
春江萬斛若為量

去時予  
在江陵

次韻孔文仲推官見贈

我本麋鹿性諒非伏轅姿君如汗血馬作駒已權奇齊  
驅大道中並帶鑾鑣馳聞聲自決驟那復受繫維謂君  
朝發燕秣楚日未歇云何中道止連蹇驢騾隨金鞍冒  
翠錦玉勒垂青絲旁觀信笑矣自揣良厭之均為人所  
勞何必陋鹽輜君看立仗馬不敢鳴且窺調習困鞭箠

僅存骨與皮人生各有志此論我久持他人聞定笑聊  
與吾子期空齋卧積雨病骨頰撐支秋草上垣牆霜葉  
鳴堦墀門前自無客敢作揚雄麾候吏報君來弭節  
江之湄一對高人談稍忘俗吏卑今朝枉詩句粲如  
鳳來儀上山絕梯磴墮海迷津涯憐我枯槁質借潤  
生華滋肯效世俗人洗刮求瘢瘕賢明日登用清廟  
歌緝熙胡不學長卿預作封禪詞

湯村開運鹽河雨中督役



居官不任事蕭散羨長卿胡不歸去來滯留愧淵明鹽  
事星火急誰能卹農耕薨薨曉鼓動萬指羅溝坑天雨  
助官政泣然淋衣纓人如鴨與猪投泥相濺驚下馬荒堤  
上四顧但湖泓線路不容足又與牛羊爭歸田雖賤辱  
豈識泥中行寄語故山友慎毋厭藜藿

是日宿水陸寺寄北山清順僧二首

草沒河堤雨暗村寺藏脩竹不知門拾薪煮藥憐僧病  
掃地燒香淨客魂農事未休侵小雪佛燈初上報黃昏

年來漸識幽居味思與高人對榻論

長嫌鐘鼓聒湖山此境蕭條却自然乞食遶村真為飽  
無言對客本非禪披榛覓路衝泥入洗足關門聽雨眠  
遙想後身窮賈島夜寒應聳作詩肩

客位假寐

謁入不得去兀坐如枯株豈惟主忘客今我亦忘吾同  
僚不解事愠色見髯鬚雖無性命憂且復忍須臾

鹽官部役戲呈同事兼寄述古

新月照水水欲冰夜霜穿屋衣生稜野廬半與牛羊共  
曉鼓却隨鴉鵲興夜來履破裘穿縫紅頰曲眉應入夢  
千夫在野口如麻豈不懷歸畏嘲弄我州賢將知人勞  
已釀白酒買豚羔耐寒努力歸不遠兩脚凍硬公須軟

朱壽昌郎中少不知母所在刺血寫經求之五  
十年去歲得之蜀中以詩賀之

嗟君七歲知念母憐君壯大心愈苦羨君臨老得相逢  
喜極無言淚如雨不羨白衣作三公不愛白日昇青天

愛君五十著綵服兒啼却得償當年烹龍為炙玉為酒  
鶴髮初生千萬壽金花詔書錦作囊白藤肩輿簾蹙繡  
感君離合我酸辛此事今無古或聞長陵竭來見大姪  
仲孺豈意逢將軍開皇苦挑空記面建中天子終不見  
西河郡守誰復譏潁谷封人羞自薦

將之湖州戲贈莘老

餘杭自是山水窟仄聞吳興更清絕湖中橘林新著霜  
溪上茗花正浮雪顧渚茶芽白於齒梅溪木瓜紅勝頰

吳兒鱸縷薄欲飛未去先說饒涎垂亦知謝公到郡久  
應恠杜牧尋春遲鬢絲只好對禪榻湖亭不用張水嬉

鵝種麥行

霜林老鵝閒無用畦東拾麥畦西種畦西種得青猗猗  
畦東已作牛毛稀明年麥熟芒攢槩農夫未食鵝先啄  
徐行俛仰若自矜鼓翅跳跟上牛角憶昔舜耕歷山鳥  
為耘如今老鵝種麥更辛勤農夫羅拜鵝飛起勸農使  
者來行水

鹽官絕句四首

南寺千佛閣

古邑居民半海濤師來構築便能高千金用盡身無事  
坐看香烟遶白毫

北寺悟空禪師塔

名齊安宣宗徵時  
師知其非凡人

已將世界等微塵空裏浮花夢裏身豈為龍顏更分別  
只應天眼識天人

塔前古檜

當年雙檜是雙童相對無言老更恭  
庭雪到腰埋不死如今化作兩蒼龍

僧與白雞

養二十餘年常立坐側聽經

斷尾雄雞本畏烹年來聽法伴脩行  
還須却置蓮花漏老怯風霜恐不鳴

送張軒民寺丞赴省試

龍飛甲子盡豪英嘗喜吾猶及老成人  
競春蘭笑秋菊天教明月伴長庚  
傳家各自聞詩禮與子相逢亦弟兄

洗眼上林看躍馬  
賀詩先到古宣城

伯父與太平州張侍讀同年此其子

六和寺冲師開山溪為水軒

欲放清溪自在流  
恐教冰雪落沙洲  
出山定被江潮浣  
能為山僧更少留

和致仕張郎中春晝

投紱歸來萬事輕  
消磨未盡祇風情  
舊因萸菜求長假  
新為楊枝作短行  
不禱自安緣壽骨  
苦藏難沒是詩名  
淺斟盃酒紅生頰  
細琢歌詞穩稱聲  
蜎殼卜居心自放



蠅頭寫字眼能明盛衰閱過君應笑寵辱年來我亦平  
踈履數從圯下老逸書閒問濟南生東風屈指無多日  
祇恐先春鷓鴣鳴

冬至日獨遊吉祥寺

井底微陽回未回蕭蕭寒雨濕枯菱何人更似蘇夫子  
不是花時肯獨來

後十餘日復至

東君意淺著寒梅千朵深紅未暇裁安得道人殷七七

不論時節遣花開

戲贈

惆悵沙河十里春一番花老一番新  
小樓依舊斜陽裏  
不見樓中垂手人

和人求筆跡

麥光鋪几淨無瑕  
入夜青燈照眼花  
從此剡藤真可弔  
半紆春蚓縮秋蛇

再用前韻寄萃老

君不見夷甫開三窟不如長康號癡絕癡人自得終天  
年智士死智罪莫雪困窮誰要卿料理舉頭看山笏柱  
頰野鳬翅重自不飛黃鶴何事兩翼垂泥中相從豈得  
久今我不往行恐遲江夏無雙應未去恨無文字相娛

嬉

黃庭堅萃  
老嫗能文

畫魚歌

湖州道  
中作

天寒水落魚在泥短鉤畫水如耕犁渚蒲披折藻荇亂  
此意豈復遺鰕鮓偶然信手皆虛擊本不辭勞幾萬一

一魚中乃百魚驚蝦蟹奔忙謾跳擲漁人養魚如養雛  
插竿冠笠驚鷓鴣豈知白挺鬧如雨攪水覓魚嗟已踈

吳中田婦歎

和賈  
收韻

今年粳稻熟苦遲庶見霜風來幾時霜風來時雨如瀉  
杷頭出茵鎌生衣眼枯淚盡雨不盡忍見黃穗卧青泥  
茆苦一月壠上宿天晴獲稻隨車歸汗流肩頰載入市  
價賤乞與如糠粃賣牛納稅拆屋炊慮淺不及明年飢  
官今要錢不要米西北萬里招荒兒糞黃滿朝人更苦

不如却作河伯婦

和邵同年戲贈賈收秀才三首

傾蓋相歡一笑中從來未省馬牛風  
卜隣尚可容三徑投社終當作兩翁  
古意已將蘭緝佩招詞閒詠桂生叢  
此身自斷天休問白髮年來漸不公

朝見新萋出舊槎騷人孤憤苦思家  
五噫處士太窮約三賦先生多誕誇  
帳外鶴鳴奩有鏡箇中錢盡案無鮭  
玉川何日朝金闕白晝關門守夜叉

時賈欲再娶

生涯到處似樵烏科第無心摘  
頷鬚黃帽刺船忘歲月  
白衣擔酒慰鰥孤  
狙公欺病來分栗  
水伯知饒為出鱸  
莫向洞庭歌楚曲  
烟波渺渺正愁予

遊道場山何山

道場山頂何山麓  
上徹雲峰下幽谷  
我從山水窟中來  
尚愛此山看不足  
陂湖行盡白漫漫  
青山忽作龍蛇盤  
山高無風松自響  
誤認石齒號驚湍  
山僧不放山泉出  
屋底清池照瑤席  
堦前合抱香入雲  
月裏仙人親手植

出山回望翠雲鬟，碧瓦朱欄縹緲間。  
白水田頭問行路，小溪深處是何山。  
高人讀書夜達旦，至今山鶴鳴夜半。  
我今廢學不歸山，山中對酒空三歎。

贈莘老七絕

嗟余與子久離羣，耳冷心灰百不聞。  
若對青山談世事，當須舉白便浮君。

天目山前淥浸裾，碧瀾堂下看銜鱸。  
作堤捍水非吾事，閒送蒼溪入太湖。

夜來雨洗碧巔岼浪湧雲屯遶郭寒聞有弁山何處是  
為君四面竟求看

夜橋燈火照溪明欲放扁舟取次行暫借官奴遣吹笛  
明朝新月到三更

三年京國厭藜蒿長羨淮魚壓楚糟今日駱駝橋下泊  
恣看脩網出銀刀

烏程霜稻襲人香釀作春風雪水光時復中之徐邈聖  
無多酌我次公狂



去年臘日訪孤山曾借僧牕半日閒不為思歸對妻子  
道人有約徑須還

莘老葦天慶觀小園有亭北向道士山宗說乞  
名與詩

春風欲動北風微歸鴈亭邊送鴈歸蜀客南遊家最遠  
吳山寒盡雪先晞扁舟去後花絮亂五馬來時賓從非  
惟有道人應不忘抱琴無語立斜暉

至秀州贈錢端公安道并寄其弟惠山山人

鴛鴦湖邊月如水孤舟夜榜鴛鴦起平湖繫纜石橋亭  
慙愧冒寒髯御史結交最晚情獨厚論心無數今有幾  
寂寞抱關歎蕭生耆老執戟哀揚子怪君顏采却秀發  
無乃遷謫反便美天公欲困無奈何世人共抑真疎矣  
毗陵高山錫為骨陸子遺味泉冰齒賢哉仲氏早拂衣  
占斷此山長洗耳山頭望湖光潑眼山下濯足波生指  
儻容逸少問金堂記與嵇康留石髓

秀州報本禪院鄉僧文長老方丈

萬里家山一夢中  
吳音漸已變兒童  
每逢蜀叟談終日  
便覺峨眉翠掃空  
師已忘言真有道  
我除搜句百無功  
明年采藥天台去  
更欲題詩滿浙東

王復秀才所居雙檜二首

吳王池館徧重城  
奇草幽花不記名  
青蓋一歸無覓處  
祇留雙檜待昇平

凜然相對敢相欺  
直幹凌空未要奇  
根到九泉無曲處  
世間惟有螭龍知

宋叔達家聽琵琶

數絃已品龍香撥半面猶遮鳳尾槽  
新曲翻從玉連鎖舊聲終愛鬱輪袍  
夢回只記歸舟字賦罷雙垂紫錦條  
何異烏孫送公主碧天無際鴈行高

元日次韻張先子野見和七夕寄莘老之作

得句牛女夕轉頭參尾中青春先入睡  
白髮不遺窮酒

社我為敵詩壇子有功縮頭先夏鼈

見玉川子

實腹鄙秋蟲

莫唱裙垂綠無人臉斷紅舊交懷賀老  
新進謝終童袍

鵲雙雙瑞腰犀一一通小蠻知在否試問嘒嘒翁

正月九日有美堂飲醉歸徑睡五鼓方醒不復  
能眠起閱文書得鮮于子駿所寄古意作雜  
興一首答之

衆人事紛擾志士獨悄悄何異琵琶絃常遭腰鼓鬧三  
杯忘萬慮醒後還皎皎有如轆轤索已脫重縈繞家人  
自約教始慕陳婦孝可憐原巨先放蕩今誰弔平生嗜  
羊炙識味肯輕飽烹蛇啖蛙蛤頗訝能稍稍憂來自不

寐起視天漢渺闌干玉繩低耿耿太白曉

次韻荅章傳道見贈

並生天地宇同閱古今宙視下則有高無前孰為後達  
人千鈞弩一弛難再設下士沐猴冠已繫猶跳驟欲將  
駒過隙坐待石穿溜君看漢唐主宮殿悲麥秀而況彼  
區區何異一醉富爰居非所養俯仰眩金奏鬲髀有餘  
樂不博南面后嗟我昔少年守道貧非疾自從出求仕  
役物恐見囿馬融既依梁班固亦事實效顰豈不欲頑

質謝鐫鏤及聞長者言婢直非養壽嚙面慎勿拭出跨  
當俛就居然成懶廢敢復齒豪右子如照海珠網目疎  
見漏宏材乏近用巧舞困短袖坐令傾國客臨老見邂  
逅吾衰信久矣書絕十年舊門前可羅雀感子煩屢叩  
願言歌緇衣子粲還予授

法惠寺橫翠閣

朝見吳山橫暮見吳山從吳山故多態轉側為君容幽  
人起朱閣空洞更無物惟有千步岡東西作簾額春來

故國歸無期人言悲秋春更悲已泛平湖思濯錦更看  
橫翠憶峨眉凋欄能得幾時好不獨憑欄人易老百年  
興廢更堪哀懸知草莽化池臺遊人尋我舊遊處但覓  
吳山橫處來

祥符寺九曲觀燈

紗籠擎燭迎門入銀葉燒香見客邀金鼎轉丹光吐夜  
寶珠穿蟻鬧連朝波翻焰裏元相激魚舞湯中不畏焦  
明日酒醒空想像清吟半逐夢魂銷



上元過祥符寺僧可久房蕭然無燈火

門前歌鼓鬪分明一室清風冷欲冰  
不把瑠璃閒照佛始知無盡本無燈

正月二十一日病後述古邀往城外尋春

屋上山禽苦喚人檻前冰沼忽生鱗  
老來厭逐紅裙醉病起空驚白髮新  
卧聽使君鳴鼓角試呼稚子整冠巾  
曲欄幽榭終寒窘一看郊原浩蕩春

有以官法酒見餉者因用前韻求述古為移厨

飲湖上

喜逢門外白衣人，欲膾湖中赤玉鱗。  
遊舫已粧吳榜穩，舞衫初試越羅新。  
欲將魚釣追黃帽，未要靴刀抹絳巾。  
芳意十分強半在，為君先踏水邊春。

飲湖上初晴後雨二首

朝曦迎客艷重岡，晚雨留人入醉鄉。  
此意自佳君不會，

一盃當屬水仙王。

湖上有水仙王廟

水光瀲灩晴方好，山色空濛雨亦奇。  
欲把西湖比西子，

淡粧濃抹總相宜

往富陽新城李節推先行三日留風水洞見待

春山磔磔鳴春禽此間不可無我吟路長漫漫傍江浦  
此間不可無君語金鯽池邊不見君追君直過定山村  
路人皆言君未遠騎馬少年清且婉風巖水穴舊聞名  
只隔山溪夜不行溪橋曉溜浮梅萼知君繫馬巖花落  
出城三日尚逶遲妻孥怪罵歸何時世上小兒誇疾走  
如君相待今安有

風水洞二首和李節推

風轉鳴空穴，泉幽瀉石門。  
虛心聞地籟，妄意覓桃源。  
過客詩難好，居僧語不繁。  
歸併得水雪，清冷慰文園。

山前雨水隔塵凡，山上仙風舞檜杉。  
細細龍鱗生亂石，團團羊角轉空巖。  
馮夷窟宅非梁棟，禦寇車輿謝轡銜。  
世事漸艱吾欲去，永隨二子脫譏讒。

獨遊富陽普照寺

富春真古邑，此寺亦唐餘。  
鶴老依喬木，龍歸護賜書。  
連

筒春水遠出谷晚鐘疎欲繼江潮韻何人為起予

自晉照遊二庵

長松吟風晚雨細東庵半掩西庵閉山行盡日不逢人  
浥浥野梅香入袂居僧笑我戀清景自厭山深出無計  
我雖愛山亦自笑獨往神傷後難繼不如西湖飲美酒  
紅杏碧桃香覆髻作詩寄謝採薇翁本不避人那避世  
富陽妙庭觀董雙成故宅發地得丹鼎覆以銅  
盤承以瑠璃盆盆既破碎丹亦為人爭奪持

去今獨盤鼎在耳二首

人去山空鶴不歸  
丹亡鼎在世徒悲  
可憐九轉功成後  
却把飛昇乞內芝

琉璃擊碎走金丹  
無復神光發舊壇  
時有世人來舐鼎  
欲隨雞犬事劉安

新城道中二首

東風知我欲山行  
吹斷簷間積雨聲  
嶺上晴雲披絮帽  
樹頭初日挂銅鉦  
野桃含笑竹籬短  
溪柳自搖沙水清

西崦人家應最樂煮芹燒筍餉春耕

身世悠悠我此行溪邊委轡聽溪聲散材畏見搜林斧  
疲馬思聞卷旆鉦細雨足時茶戶喜亂山深處長官清  
人間岐路知多少試向桑田問耦耕

山村五絕

竹籬茆屋趁溪斜春入山村處處花無象太平還有象  
孤烟起處是人家

烟雨濛濛雞犬聲有生何處不安生但教黃犢無人佩

布穀何勞也勸耕

老翁七十自腰鎌  
慙愧春山筍蕨甜  
豈是聞韶解忘味  
爾來三月食無鹽

杖藜裹飯去匆匆  
過眼青錢轉手空  
贏得兒童語音好  
一年強半在城中

竊祿忘歸我自羞  
豐年底事汝憂愁  
不須更待飛鳶墮  
方念平生馬少游

湖上夜歸



我飲不盡器半酣尤味長  
籃輿湖上歸春風吹面涼  
行到孤山西夜色已蒼蒼  
清吟雜夢寐得句旋已忘  
尚記梨花村依依聞暗香  
入城定何時賓客半在亡  
睡眠忽驚雙繁燈鬧河塘  
市人拍手笑狀如失林麀  
始悟山野姿異趣難自強  
人生安為樂吾策殊未良

寒食未明至湖上太守未來兩縣令先在

城頭月落尚啼烏  
烏榜紅舷早滿湖  
鼓吹未容迎五馬  
水雲先已颺雙鳬  
映山黃帽螭頭舫  
夾道青烟鵲尾爐

老病逢春只思睡獨求僧榻寄須臾

次韻孫莘老見贈時莘老移廬州因以別之

爐鎚一手賦形殊造物無心敢望渠我本疎頑固當爾

子猶淪落况其餘龔黃側畔難言政羅趙前頭且眩書

莘老見稱政事與書而莘老書至不工

惟有陽關一杯酒慙慙重唱贈離

居

贈別

青鳥銜巾久欲飛黃鸞別主更悲啼慙慙莫忘分攜處

湖水東邊鳳嶺西

次韻代留別

絳蠟燒殘玉笋飛  
離歌唱徹萬行啼  
他年一舸鷓鴣去  
應記儂家舊姓西

月兔茶

環非環玦非玦  
中有迷離玉兔兒  
一似佳人裙上月  
月圓還缺缺還圓  
此月一缺圓何年  
君不見關茶公子不  
忍關小團上有雙  
銜綬帶雙飛鸞

薄命佳人

雙頰凝酥髮抹漆眼光入簾珠的皪故將白練作仙衣  
不許紅膏汙天質吳音嬌軟帶兒癡無限閒愁總未知  
自古佳人多命薄閉門春盡楊花落

吉祥寺花將落而述古不至

今歲東風巧剪裁含情只待使君來對花無信花應恨  
直恐明年便不開

述古聞之明日即來坐上復用前韻同賦

仙衣不用剪刀裁國色初酣卯酒來  
太守問花花有語  
為君零落為君開

李鈴轄坐上分題戴花

二八佳人細馬馱十千美酒渭城歌  
簾前柳絮驚春晚  
頭上花枝奈老何  
露濕醉巾香掩冉  
月明歸路影婆娑  
綠珠吹笛何時見  
欲把斜紅插皂羅

於潛令刁同年野翁亭

山翁不出山溪翁長在溪

前二令作  
二翁亭

不如野翁來往溪

山間上友麋鹿下鳬鷺問翁何所樂三年不去煩推擠  
翁言此間亦有樂非絲非竹非蛾眉山入醉後鐵冠落  
溪女笑時銀櫛低我來觀政問風謠皆云吠犬足生菴  
但恐此翁一旦舍此去長使山人索寞溪女啼

天目山  
唐道士

常冠鐵冠於潛婦女皆插  
大銀櫛長尺許謂之蓬沓

### 於潛女

青裙縞袂於潛女兩足如霜不穿屨  
簪沙鬢髮絲穿杼蓬沓障前走風雨  
老澤宮粧傳父祖至今遺民悲故主

茗溪楊柳初飛絮，照溪畫眉渡溪去。  
逢郎樵歸相媚嫵，不信姬姜有齊魯。

自昌化雙溪館下步尋溪源至治平寺二首

亂山滴翠衣裘重，雙澗響空牕戶搖。  
飽食不嫌溪筍瘦，穿林閒覓野芳苗。  
却愁縣令知遊寺，尚喜漁人爭渡橋。  
正似醴泉山下路，桑枝刺眼麥齊腰。

每見田園輒自招，倦飛不擬控扶搖。  
共疑楊惲非鋤豆，誰信劉章解立苗。  
老去尚貪彭澤米，夢歸時到錦江橋。

宦遊莫作無家客舉族長懸似細腰

於潛僧綠筠軒

可使食無肉不可居無竹無肉令人瘦無竹令人俗人  
瘦尚可肥士俗不可醫旁人笑此言似高還似癡若對  
此君仍大嚼世間那有揚州鶴

與臨安令宗人同年劇飲

我雖不解飲把盞歡意足試呼白髮感秋人令唱黃雞  
催曉曲與君登科如隔晨敝袍霜葉空殘綠如今莫問



老與少兒子森森如立竹黃雞催曉不須愁老盡世人  
非我獨

寶山畫睡

七尺頑軀走世塵十圍便腹貯天真此中空洞渾無物  
何止容君數百人

東坡全集卷四